



明文海卷二十九

餘姚 黃宗羲 編輯

賦二十九

居處一

葯房賦 王禕

夫何美人之練要兮，謇脩好以為常。既昭質之弗虧兮，又姱節之孔彰。爰托物以自表兮，曰清修之是將。滋幽蘭而樹蕙兮，蘭為佩而蕙為纓。褰薛荔以為衣兮，集夫容以為裳。既所服之孔修兮，粲芬々其文章。所處欲其

芳華兮又申之以葯房何斯房之結構兮獨以葯而為  
之薦芳馨之菲々兮絢繁飾以陸離文杏煥以成梁兮  
琢辛夷而為楣椽木蘭之差々兮稅文藻其紛披繚疏  
牖以杜衡兮扈素壁以江離桂樹鬱其當軒兮陰團々  
而成帷敝百草為庭實兮肆把玩乎瓊枝襲芸編以總  
總兮緇室桑之朱絲餐繁英典落蕊兮飲沆瀣以自怡  
澹道遙以容典兮聊栖遲而偃仰撫榮華之未艾兮睠  
茲葯以自況維葯之澤兮所以示昭質之匪飾也維葯  
之馨兮所以表矯節之不忒也朝夕處乎斯房兮信脩

潔之不忘苟所好之絕俗兮人不知其何傷方世俗之  
溷濁兮糝薰猶而莫質蕭艾蔽乎中野兮菘菜蒙其盈  
室彼惡椒果何物兮亦雜然而充幃衆舍是而尚非兮  
孰于芳其能祇何美人之耿介兮乃獨為此度也夫豈  
傲世以自異兮亦惟好脩之故也委厥美以自棄兮固  
非其心之所安也使矯名而無實兮又胡若是拳々也  
碩予生之侘傺兮曾靡求乎安處愧獨守此敝廬兮蓬  
蒿紛其環堵雖凝塵之滿席兮情晏然猶冲豫外物一  
無所拘兮曰惟德之為馨真和順之中積兮致英華之



外形徒潔脩以自表兮愧非予之所能既好尚有不同  
兮又孰撥予之中情幸美人之嬋娟兮夙與予其目成  
欲相仍乎斯房兮恐莫堅乎芳盟命靈氛為予筮筮兮  
靈氛告予以吉占曰外好雖不同兮實中情之可堅聞  
斯語以邑鬱兮恐佳期之遲暮思美人而未見兮悵盤  
桓而延竚將何物以結言兮恨衆芳之已萎采芳洲之  
杜若兮聊遺予之所思願相從而相羊兮終歲晏以為  
期慮誓言之未固兮結微情以成詞

詠歸亭賦

王禕

夫何君人之耿介兮志與俗其背馳絕紛華之外騫兮  
壹冲澹以自怡守忠信以佩服兮被道義之光輝豈修  
禊之徒事兮將聖賢以為師睠笠澤之沃野兮寔若人  
之所居豈藏修之無所兮有厦屋之渠々廓間田以開  
圃兮俯平川而結廬木參々以繞舍兮水湯々而循除  
爰有亭其新構兮謝雕甍與綺疏既琴瑟之在前兮亦  
左圖而右書來良朋于遠方兮聊于焉而樂娛揭亭名  
曰詠歸兮示聖門以為徒仰聖門之多賢兮各負材而  
懷器求藝能之孔多兮由剛勇而尚義彼願試於為國兮



明文海 卷二十九  
蓋同科於政事亦循々以謙讓兮嘗遠齊以通使彼  
小相之願為兮亦量能以自計迹三子之所志兮狗功  
名而規々何點爾之曠達兮獨從容以無為謂我服之  
既成兮屬莫春之芳期集冠者及童子兮浴沂水之戲  
嬉遂風涼乎舞雩兮同詠歌而乃歸唯所志之若斯兮  
斯脫畧乎物累弗舍已以從人兮殆春融而蟬蛻俾氣  
象于堯舜兮同化工乎天地宜有契于聖心兮亟嘆賞  
而興喟念去今踰千載兮孰此志之能承何若人之耿  
介兮乃感慕以作興亦見道其庶幾兮匪惟飾乎修名

繼寥々之絕響兮長詠歌于茲亭日遲々以載陽兮雲  
油々以成雨鳥和鳴以在樹兮魚羣躍以在渚任衆情  
之變化兮嘉萬彙之樂所撫物我之各適兮肆安居而  
逸處彼世俗之溷隘兮囿利名為網羅衆羣趨以競進  
兮紛惶々其謂何苟返求乎初服兮亦所得之已多余  
張々之無類兮誓蹈道之弗頗微若人之吾誰與依兮  
願從游以靡他

後東園賦 朱升

余既為東園賦寓言放詞自病其繁不能使人一見

心快遂更為後賦

石門陳君悠然見山即居之畔辟茲東園割鄉井之廣  
衰藂卉木之繁植於焉寄興於時言：攬遙空之雲霧  
俯流水之潺湲涉斯園而富失其肆貧解其孽少者愛  
日老者忘年超乎世網之外融乎化機之先恍不知托  
身乎宇內實寓目於斯園冷々兮胸臆虛明羅萬象而  
灑然者也若乃美觀沓見異狀層出遽而數旃莫終其  
物地生其圩天施其巧人因其質制之無了軒窓翠侍  
樓環秀也琴書清娛堂四美也香葉鬱々栢歲寒也佳

寔垂々梅青子也花伴月圓長春亭也色蒸霞爛武陵  
源也香雪落盃芳且馨也嫣紅夾徑花中仙也有亭濟  
舟以利涉也有臺凌雲以俯臨也閑居生計所樂者善  
也虛櫺搜納樂得之心也一曲一景獻怪挺竒紆縈迤  
邐莫知所之目應接而不暇心遊漾以忘歸斯園也仙  
之所幻歎人之所為歎余以為方輿之景何所蔑有得  
而樂之非善曷守必有通神之財則可以領佳而會秀  
必有賞心之具則可以朝歌而暮酒又必有千堆錦之  
逸才而後可以發斯景之清幽又必有萬金產之令裔



而後可以綿斯景之永久或有鳴騶之入束帛之賁果  
不以外之偽易內之真否耶主人才高行直心妍貌古  
人悅其賢姦畏其武奮自信而出類余愛之而莫助爰  
周覽其東園集厥美以為賦

勉菴賦

楊守陳

四檐白雲半壁蒼蘚誰氏之菴榜題曰勉蓋赤城之老  
生承粉署之餘烈志屢屈于文場心長懸于魏闕鉄硯  
將穿唾壺盡缺白首一經猶勉不輟勉之一辭廣矣大  
矣貴賤同科古今一軌乃若閭閻之子沮溺之曹業惟

務本力昏作勞荷雨蓑于南陌植烟杖于東臯冰未開  
而耕壑水方沸而耘耨凜腰弓之欲折赫背火之恒燒  
積三時其不懈冀百穀之皆饒若夫梓匠輪輿築冶鳧  
稟弓和六材畫績五色各執藝以效勤或貪傭以成疾  
皆已闔兮強開腕垂腕兮未釋悵花柳之芳菲羨禽魚  
之放逸至若三槐九棘庶尹百司夙興見斗夕寢聞雞  
侍延英而戰汗冒九折而驅馳厭簿書之沓擾惡敲朴  
之驚啼思醉花于金谷將嘯月于瑤池恥功名之不立  
惧職業之將隳恒矻矻以終歲敢悠悠以度時復有望

明文海 卷二十九  
重勲高窮極富將逸樂之無期乃滿盈之有懼嗜紅鱗  
兮若辭悅翠蛾兮却頌挺高節于晚凋煜餘光于方  
暮又若五都三市萬水千山紛攘利以交易競乘危而  
往還唏颯風于粵海咲積雪于燕閩惟百羸之足望曾  
一寢之遑安若乃邊塵四驚烽火交灼三軍競馳兩陣  
相搏鼓礮殷兮鳴雷戈矢紛紛灑電孰不魄褫而魂飄  
心摧而膽落強賈勇以鷹揚遂捐軀而虎躍收功業于  
垂亡獻俘纍于既縛標銅柱兮炎荒銘燕然兮朔漠茂  
矣哉人無往而非勉事無勉而弗成生何徐于本實

獨汲于華榮盍改爾轍迴爾航發軔兮橫渠張帆兮  
紫陽踰濂洛而汎邁望洙泗而高翔朝蠹沒其無已夕  
燕娛其未遑景孳之伯禹企豐之文王茹仁義為  
玉食服道德為金章庶垂名于不朽同天地之悠長

已有園賦 魯鐸

粵昔余有茲園兮首宦途而違棄中罹疾而獲請兮逮  
蕪穢而復治羈幽人之過我兮謂茲豈應于無名之  
余園曰已有兮矢終老而依憑繫池臺之微具兮列香  
芰以為區惟卉木之整華兮紛色異而氣殊既素積以皜



夜兮亦朱殷而赭曙或步屨乎其中兮或席蔭于其下  
寘名藹而為塢乎天寔縱夫落花繁華惟譜牒之有稽兮悉  
吾園以為家嘉樹沃其成列兮夫豈獨善夫摘柚果寔  
苟宜于土性兮皆新登而時轉挹池泉以灌余蔬兮難  
荒翳而蒔芳草攬芙蓉于清波兮閱潛魚之在藻沿輕  
舟于罄渚兮躋鳧洲之草堂據紅雪午陰之磯兮信釣  
縷以相羊取憩弄之夷猶兮撫楸枰而識異薦鳴琴于  
石几兮按古調以自憚田父相求于松蔭兮話桑麻之  
有養吾令荆布任營兮蒞松葵而就餉神魂知由所稔

兮夢翰苑與成均豈忘情于堯舜之從兮身羸憊而無  
因心營以謀報兮將遠事乎芹曝願閭閻之相與戮  
力兮還唐虞之舊俗朝余饒九畹之蘭兮夕紉夫湘之  
蕙茝苟衆服之屑余同兮勞采擷其奚懈余陟夢野之  
臺兮望辰極乎帝鄉扃大椿之洞兮忽塵宇之相忘安  
余分之遇兮求余心之所好苟沒世其有稱兮奚外身  
而有校松柏森其蒙鬱兮筠篁比而若櫛衛檻闌以東  
下兮狗坡陀而周折查篠出而曠虛兮臨明池之可鑑  
儼山林之盡歷兮獲江湖之泛泛取于城市之墟兮亦

殊無而僅有惟余心之所會兮擬咫尺于千里時鼓枻  
于清漣兮騰羣魚之待餽晚痺敷之安巢兮鳴禽競而  
將子江梅侈夫朱英兮皎安榴之素萼旦月桂之長春  
兮倏舜華之間落坐碧梧之真陰兮隕佳粒于巾舄披  
藜桂而襲芬兮服冠裳其無數豫章勃焉峻達兮勢茲  
務于干霄杉檜櫨橘枝相樛兮若求友于後凋善飛潛  
之得時兮悅草木之向榮遭聖哲之在上兮宜萬類之  
咸成惟中林之宜憂兮逃大暑而迅免夫何霽夜之棹  
遊兮適非遐而若遠念烟霄之朋舊兮渺遙濶其誰即  
眷林丘之親故兮繼<sup>朝</sup>新暮而相及人生恒亦有涯兮嗟  
世事之莫塵往者幸于免咎兮來者可委於余分亂曰  
謂余衣之既渝製芰荷而重成兮謂余歲之可卒資杞  
菊之充盈兮冀形逸而神閒余茲賴以永齡兮苟松橋  
之不予誣從玉軼以迴凌兮

歲寒軒賦

陳璉

猗歎美哉歲寒之為軒也去戎衛而匪遙隣公解之伊  
邇峻宇臨街崇基猶砥文窓洞開遠見百里雄創闢之  
高明較於制而靡侈每肆遐矚足暢幽情羣山獻秀或



蒼或青奇形異狀不可得而名惟松與柏近乎簷楹根  
蟠厚地樹蔭空庭于是外設緇簾內施棊几爐鑄博山  
劍懸秋水蓄鄴侯之書講卻縠之禮延賦詠之鴻儒遠  
酣歌之妖妓凡古今之名物亦無求而弗備想夫軒居  
整飭松柏蕭森陽鳥轉影綠雲布陰苔錦滿地市塵不  
侵巢遼海之孤雀來炎州之珍禽度清風于萬壑激鳴  
籟于喬林于斯時也正宜投壺雅歌擊節長吟或鼓曾  
點之瑟或操伯牙之琴神境適愜萬慮消沉然則此皆  
尋常之樂未足以表歲寒之心也至若萬木號寒窮陰

閉塞臘雪飛璫山川改色郊野斲樵牧之踪江湖絕禽  
鳥之跡百卉以之而摧殘萬彙以之而變易惟松柏之  
森然翠盈、而欲滴於斯時也寄傲軒中或倚或徙醉  
飛觴而飲羊羔坐清談而揮麈尾效斯立之吟哦慕田  
鸞之服餌因有感于流光復細推于物理何草木之易  
零惟松柏之獨美想其為物也受正氣于天地稟精華  
于陰陽故能挺生奇質異乎衆芳排九霄之風雲傲嚴  
冬之雪霜恬晚節以自高期有用于明堂豈聖人嘗取  
以比君子之德而君子亦假歲寒名軒以徜徉者耶詞

曰嚴冬屆兮萬物閉兮雪霰紛兮山川寂寥兮俯仰六合無垠兮維茲嘉植節操貞堅兮共守歲寒以盤桓兮

明文海卷二十九

明文海卷三十

賦三十

居處二

山居賦

為范至祥作并序

李裕

辛丑之冬十月乙卯是日天宇瑩淨朝曦曠曠明霞

絢綵于平林晨雞亂號於隣屋予乃命僕夙駕整衣

就車渡鄭溪之澁漻踰文岡之崎嶇過沍塘之仁里

訪故人之山居于時山明野潤風清日溫主人歡迎

餘姚

黃宗羲

編輯



童稚候門延予入室坐以甌甑鼎彝檀笈地席籩蔭  
奉匱進悅者滄、躋、操卮執觚者周旋進趨獻我  
以大宛之葡萄飲我以頽渚之紫筍豆寔南海金齏  
之鱠杯分東坡玉糝之羹廬醢筮菹之是將糗餌粉  
餐之送進山肴野蔌靡不備具酬酢既畢予亦醉焉  
乃與主人退坐于庭軒之下乘鮮飈之颺颺觀白雲  
之悠、白雀飛舞鳥鳴啾啾遂使予懷頓豁神思飄  
道乃喟然嘆曰僻哉幽哉真隱者之居也故為賦之  
隱者為誰故人范君至祥也其辭曰

夫何一佳士兮獨竽、而寡儔蹈先哲之軌轍兮寄書  
圃以遨遊絕紛華以潔內兮惟德業乎好修匪仁宅而  
弗居兮匪義路而弗由懷良王之璀璨兮被美服之陸  
離紉芳蘭以為佩兮又繡之以江蘺假高衢以騁力兮  
何遭際之不時譬濟渡而無航兮心惆恍而猶疑抨巫  
咸以兆禎兮著飛遯以為吉遂隱曜而爇幽兮求黃綺  
以為匹厭囂氛之澳忍兮意翩、乎遠徂擇山水佳麗  
之地兮茸茅茨以為廬背峯之千仞兮面膏壤之百區  
道林嶺岫而西峙兮超嶺巖截嶂而東趨纏縈迂之小

徑兮挾漱冽之清渠間庭軒之明敞兮素窓楹而不履  
闢開田以開圃兮挿木槿以為籬落既琴瑟之在壁兮  
又圖書之盈閣森長松古檜于遠阜兮鬱華楓翠柏于  
前岡蔭楸梧綠舍以凝綠兮間槐楊被路以搖黃含丹  
芍藥襲紫薔薇爭妍而獻秀兮忘憂之萱愈疾之菊挺  
生而薦芳茂蕙芷芄以統砌兮崇蘅藜藿以當窓  
若乃橙橘蒙金梅柰曜白丹杏朱櫻兮羅生石榴胡桃  
兮函列大谷之梨烏桺之柿飛英而同榮枝弱之棗房  
陵之李騰寔而甲宅蒼藿含滋兮葑蔓流澤藟茂連藹

兮薤韭代殖菘芥帶露而暢茂兮芸藜沾雨而肥茁瓜  
匏緣陰以延蔓兮葵藿傾陽而可摘况夫蚕桑動而翎  
鳥始降農務興而鷄鵠有散鶴鷓鴣兮棲深叢而嘲  
嘲晰々鶴鷓杜宇兮轉高樹而啾々嚶々巨石顛夔而  
魄礪兮鱗騰魁而虓嘯溪谷豁豁而窈窕兮藏猿獠之  
哀鳴洞雲出岫兮影悠揚而點綴溪流激石兮勢滂湃  
而砰訇類終南之深僻兮宛豹林之弘曠同子真之高  
致兮有稚圭之氣象絕塵間之嘲鞞兮超域中之塵埃  
擷羣芳以玩蕤兮倒接籬而曳杖追樵收以抱犢兮醉



隣翁而擊盞暫棲遲以養天真兮聊相羊以釋情悅而  
又系之以歌曰春陽煦兮山花馥夏風暢兮山樹綠涼  
月皎兮山鳥號朔霰飛兮山峰禿山居山居真僻哉四  
面無隣祗深竹池有魚兮埒有雞圃有蔬兮廩有粟朝  
犁鋤兮暮經書酒一瓢兮碁一局俯首石兮盪清流坐  
明月兮賦新曲放情物外摠無羈世事紛紜任榮辱

竹溝泉賦

楊循吉

時雨晝零至夜不休集我屋上仰瓦承流乃所積之既  
多遂衝奔于竹溝爰有筠管立於其下中節既去洞乎

空者溝唇來接其水倒瀉鏗々奇響相擊而鳴應空答  
韻如谷中之聲觀其滴瀝傾注九止一作譬銅盆之在  
地而墮淙之投落楊子讀書既困安就床篲目合神定  
泉聲時得若雅樂之作自有奏節忽寤而知又寐而失  
以為彈絲品竹敲金擊石千呂萬律皆出人力然又非  
貴介公子莫得而常接也而此泉敢特借於雨其音自  
然若虛堂築杵乍歇乍有鈴乎答語又復助以嘈雜之  
細韻集堦除而戰簷廡蓋貧居之士可以寄聽于厭飫  
焉不必解衣輟食呼工召伶而為一日歡樂之舉也楊子

於是心納耳受怡然自適起而賦之書之於策

淳菴賦 李承箕

太虛之惟一兮曠乎其混茫其來無體兮其去無方故  
無始于存兮亦何終於亡風雷以變動兮日月以為明  
鬼神以屈伸兮寒暑以更相物萬回薄兮曰惟其常所  
謂伊人兮空悵望而難見釋宇宙同大通兮亦何有于  
閑鍵山河惟形兮春風惟面雲霓惟衣兮風月惟緣裳  
集落葉兮隕穉其弁酥芳華以朝渴兮月以夕嚙枕絕  
壑流兮雲根為薦古今兮蜂紛而蟻爭死生兮浮雲而

過電一視兮無榮枯夷宅兮胡利便魚兔得兮忘筌蹄  
鋪張墳素兮棄紛華之箋傳抱甕兮無機真珉兮何琢  
鳧短兮雀長木鷄兮何變紛渾元其忽恍兮俯千春而  
浩歎因事物以隨變兮形既妄而影誕嗟萬竅不足激  
乾坤兮墜終古于虛幻慨前路之悠々兮一寄身于鵬  
鷄若乃軒輊于進熟兮齒修齊而獻榮落日迷丹唇暖  
兮七盤妍迹其雲散鄭紫衛紅浮而艷兮棄霓裳于萎  
爛雕翰畫轂兮渾堅其畫鏟翠羽纖揚兮綠波射意而  
爛瀾圓丘瓶罌而登薦兮曩尊龍杓其誰盼循荆棘之



狹斜兮舍周行之坦、厭麒麟之仁軌兮、於  
沙虫其何但我思古人兮無方我見古貌兮胡俛

登樓賦 有序 桑悅

學舍中有小樓予名之曰乾坤一寄時登覽以寄遐  
情予懼茲樓之易毀也爰作賦以傳不朽云

予少期搏于九萬邇薄風而禊、占師儒之末席抱圓  
材而應規然戚、興戀主之念情、動懷親之悲幸茲  
樓之高明眺虛空而自怡曷道遣乎世慮揖雲霞而賦

詩 一滾說下恨市塵之伊邇之盪目之崛奇 壯樓之乏

末生波濤然開窗延四海之明月啟戶納八方之涼颼匪堯

夫之傑閣饒廣大之若斯 取古今大家景象以為樓之

之傑閣則樓又非所登之樓矣文章年時遊乎南康 此

能虛處取用能入神此第二段意見樵於匡廬之顛釣於彭蠡

下又別生議論如連山絡之湄者意甚歆焉然察其輾芳洲之宿莽伐空谷之桂

枝形蠢、而意嗤、則又安知水石之多姿信造化之

光景為吾輩而設施 前因言樓之乏佳景至此又言非

其入維得佳景亦不知好矣此第茲樓雖限吾之偉觀不限吾之遐思 此又出一奇

三段意 從心上說去

登臨之際試心存乎瀟湘洞庭雁蕩峨眉反視霸府之  
耽：覺水繞而山圍儼環樓之多景兮供吟眺於不貲

此言環樓皆市廛惟胸藏丘壑則又皆化為佳彼登岳  
景矣又非無蕩耳目之崛竒也此第四段意

陽與黃鶴者心又或繫于菑畬見塵外之艸木兮化未  
秦之菲：併人樓而相準兮造化又焉肯以彼而易茲

因上文言胸藏丘壑則市廛皆化為佳景此又言嗚呼  
主非人則佳景反化為塵俗矣此第五段意也

噫嘻此以下平收乾坤浩：熟吾一炊明日之事陰晴

拾到樓上

未期沉飄：之萍梗兮寓茲樓而幾時惟修道德為樑  
棟兮吐文章為楠椽庶樓名之羽化兮不成敗於氣機

黃金臺賦

桑悅

嗟予生之好遊兮擬放浪乎九垓入燕都而暫憩兮逝  
將去而徘徊寄身世于一哂兮獨眷戀乎茲臺胡置金  
之故地兮積千古之塵埃悵遺址之莽：兮愁鬱結而  
未開有地硜：兮獨不產乎蒿萊烏將下而躑躅兮雲  
欲度而遑迴觀雲鳥之敬護兮識真址之所在抑昔昭  
王之初政兮受強齊之控扼勢有輕而可助兮力有寡  
而可益侵雲漢而築臺兮招竒賢以為國置千金於臺  
端兮心貫金而赤色拜郭隗以為師兮忽毅辛之繼迹



士不輕於一感兮感精誠以來格走潛王於臨淄兮重  
揚威於莒墨雪先王之遺恥兮成霸強之偉績匪吾前  
身之故巢兮胡念此而不忍釋也重遺址而莫踐兮念  
昭王之貴德也風蕭々而吹衣兮雲陰々以將莫乘返  
照以旋歸兮神愴怛乎中路顧所乘之駘駕兮越臺前  
而縱步使瀏々之竒姿兮騫將行而淚墮嗚呼噫嘻沉  
英鏗光匪士之祥簡才棄能乃國之殃屈原悲憤以投  
湘祖述慷慨以渡江困賈誼於長沙竄李白於夜郎寄  
遊魂之無地兮或茲臺以徜徉易水為酒兮碣石為觴

招諸賢兮共酌昭王天與久兮地與長臺肉可朽兮臺  
骨不亡

明文海卷三十一

明文海卷三十一

餘姚 黃宗羲

編輯

居處三

逍遙園賦

穆文熙

余舍東有園一區帶城下自為儒時與拱辰石君分席共業為鉛硯之所後相繼登第去比余既解考功郎歸稍作地館壘山石裒集詞翰日棲遲其間乃未幾而拱辰倦于太僕亦謝病歸則無日不晤於



此略則習於幽事而委命順理怡情養性庶幾有道  
遙之風余因據莊生逍遙篇為賦紀之拱辰覽之謂  
與樂志論唐子西語相輕軒也遂刻置臺端其辭曰  
伊予性之好僻兮開別圃于城隅築垣墻以周衛兮誅  
白茅以為廬蒔花竹以匝徑兮種菱芰以盈池懸桔槔  
于金井兮時自挽而灌蔬招隱以名吾洞雲鶴以號吾  
堂臺則有讀書遲鴻東山俯谿皆環列槐柳有雲樹之  
蒼茫亭則有牡丹芰荷松蘿止觀悉斜帶清溪儼山家  
之行藏時其條風布暖紅葉繽紛朱明協候綠葉垂雲

秋至而籬菊歲蕤冬至而簷梅郁芬景緣時至興隨賞  
殷尔其偕我良朋契若蘭薰鶡冠草履褐衣苧襟相典  
臨花塢步芳亭撫白日玩青冥觀儵魚聽鳥鳴數飛花  
褰落英弄池水盪浮萍指點竒石較計陰晴雲霞團座  
鷗鳥不驚而或投博賭勝負奕取羸縱歌層臺蹴踘廣  
庭鳴琴深洞放鶴高城已而偃息臺端何營酒泛  
綠醅飯煮青精時復有墨客琴士畫史騷流詩談白雪  
圖擬丹丘譜探飛龍帖抹蒼蚪日有文事之起予了無  
俗務之交酬時燕坐兮箕踞長嘯兮科頭羲和兮御頓

玄兔兮影留遽、兮蝶夢擾、兮浮漚方來兮隨分既  
往兮堪羞若夫五嶽三江勝地無垠梁苑金谷樂事紛  
紜金張之家炙手可熱許史之門吐氣成雲子雲著書  
而諛莽相如作賦而得金稷下集鳴而千人辨折座間  
塵動而百夫生欣古非不有吾非不聞第以靜躁不同  
趨舍有方或圖南以廣運或蚊睫以自藏苟所志之得  
適雖微渺其何妨吾故遵南華之遺訓於以逍遙乎此  
鄉於是拱辰聞之躍歌曰龜天地兮蘧蘧紛世事兮風  
塵紉幽蘭兮吾黨撫桂樹兮城隅誓從子兮逍遙安所

問兮盈虛歌既余復為之辭曰惟余之志子與侔兮惟  
余之園子與遊兮園有水澤被芙蓉兮園有碣石鬱虬  
龍兮火山焚不能為之藝層崖水不能為之裂返巨雀  
于條枝脫蒼鷹于繫紲與子共逍遙於一世尚期不媿  
于往哲

藥市賦

楊慎

蓬丘仙伯七刀圭而通神奈園老宿品千二而稱珍何  
如蓉城之日重開藥市之春若夫岐摯湯液和緩漚滌  
采嘉林之嘉草掇芳洲之芳羞屏風水發書帶山抽人



參三極來自高句麗之國桃枝九折出於雋昆明之阨  
椒聊下虛星之舍果窳薦織女之樓逢茅龍之衛叔遇  
木羊之葛由檢本草之聖錄極山海之冥搜別有天棘  
日精澤葵海藻火林之蔚炎柯雪津之擢陽草款冬叩  
冰而吐葩葶藶迎露而先槁青綸碧組蒼龍就食於甲  
辰素茵皜陳白兔騰仙於辛卯帶休鬼醜蕩邪而蠲憂神  
錦仙鹽駐顏而難老又不若剗犀截角搯翠刪毛澄  
禺山之水碧醴樊桐之金膏鮫人泣珠而酬價狼臙鯢  
金而解橐神鹿兩頭飲上池之水靈鳥四翼歸金匱之

韜莫不攀丹危而陟翠險霄仙的而下神囂涉森：馳  
萃：刈翹：伐丁丁香草比于君子嘉卉方於貞女藤  
名簡子花號長卿五芝色配乎五嶽六飲芳冠乎六清  
乃延巫鼓招長桑飛絳雪擣玄霜巴戎赤斧梓谷王昌  
蓬州塗定辭玄張開光希夷出崇龕之落真多栖葛瓚  
之鄉黃足之鳥呼季玉而竝復朱頂之鶴名令威而駢  
翔負局磨鏡之翁箍桶誦易之叟扶龜床於行阿策  
鳩杖于林藪嚴遵之芳乳平分王烈之香膏共剖是月  
也江波錦落火井星還楓瑟：而鳴籟菊英：而綴斑

訪名跡于古昔啟藥市於重閔被開明廣都之野帶杜  
宇天隳之山哀危蟪于寸陰矜局竈於井谷布濩天府  
之區蔓衍坤維之域八萬四千之人烟五十四州之謠  
俗國無夜戶之虞人有春臺之燠邵公程鄭之倫驥子  
魚文之服乍發劑以針龍奄飛符而擒蜮黃耆背鮐蒼  
魚鬣蝸行歌擊壤群嬉聚沙成行鴈鴈學語鴉、毛姬  
餌葉鳳子藏花色輝九壁之錦光漾百潭之霞採思婦  
之卷耳折放臣之疎麻息風枝之不靜起露夢之含嗟  
崔公之錦云遠華陀之囊已遐既富矣韓康之肆寧蘄

乎博望之槎楊雄夢腸頓醒滯思于雕篆相如消渴歎  
捐沉疴于齒牙豈知西顛之盤露北方之河車哉有林  
閭翁孺者起而為系曰黃能兮休入寢朱巖兮罷窺屏  
永道兮二豎載殲兮九嬰分菊潭兮灑、宴蓉城兮冥  
冥鴻安丘繼而作曰安期神樓散扁鵲陷冰丸銀筒昔  
誰蘊金瓶今子殫謝驚颯兮駐流電訪大葉兮浴還丹  
邀錢幄兮雀躍共喬松兮鯢桓主人聞之欣然稱蘭修  
容麗級獻壽升筵敬緝光誦奉以周旋

羅蔭堂賦

許相卿



矗雲峰之亢峙眇玉湖之澄泓孤城值其秀爽而隱居  
卜於其間管茅上覆泥堵周環恒雨暘之淋炙缺苦蓋  
于東南主人仰屋太息曰狡兔三窟鶴鷄一枝咸克禦  
外侮而圖寧居矧吾將幹前壘燕後昆碩無所庇吾廬  
乎爰躊躇其構思又般礪以殫慮哀若天啟謀與神會  
繫膠木之長蘿方下縈而上延彼徒贅于有餘我則病  
夫不完爾乃解自樹杪援之簷端補此罅隙紓彼糾纏  
意祖少陵之詠巧奪媧皇之權老榦繫諸撓棟密蔓勻  
于疎椽柔枝盤旋以重複修條縷絡而夤緣初蕭森兮

扶疎久蒙密兮陰沉旁翳薈兮紛敷上盤結兮雍闕遠  
睇兮矯龍首而騫鳳翼迫視儼黃琮之間蒼玉春薦芳  
蕊可方把菊夏布清陰弗讓修竹冬雪積而玉蛟結蟠秋  
風振而冰絃斷續晨則雲表之露下零宵而書檠之  
燭上燭殆造化有意毓茲堂之秀滌世氛之俗者也客  
陋仍廢夫瑣々數椽革而劓之曾不費子下筋之需潤  
筆之賄也主人輒然而笑適然而興顧謂客曰昔常議  
斯役矣圖厥新恐彰先陋而競俗侈葺以故惧蹈前愆

而貽後累又嘗博觀今昔之變矣耽：巨厦巍：崇宮  
拔地千尺在天半空計其壯麗悠永將與金石者同亡  
何勢窮理復化為塵蒙而已矣而此堂特借蘿以補茆  
任造化之經營役陰陽以刻雕潛德培其本餘澤潤其  
標吾聚族處于中也寒露不吾淒赫日不吾驕雷電不  
吾震撼風雨不吾飄飄容與毒蛇其樂陶：矧其易故  
增新我財不靡巧構密架人力不勞惟歷歲之愈久則  
維持之益牢造物者輟其功則斯堂方就圯也而子得  
無以吾論為過高乎方將結陋巷為芳隣追巢居於太

古味道德之腴狎詩酒之侶標俗子而出諸戶高卧潤  
視藐富兒之土木齷：鼠壤蟻垤無足數也言未既客  
謝曰命之矣逡巡而退

居然亭賦

并序

陳鶴

夫刻楠之室未足娛心塗金之居聊以適目若以臨  
虛取悅矚遠抽思倚薇風以送歌抱松雲而舒咲則  
九華三章無以肆其觀含芳永光但以章其麗契道  
之斯何取焉西淙洪公錄浙參事身逐塵軒而心留  
霞谷蓮船載月長為湖上之賓珠履乘煙幾作山中



之客偶于淨慈沙門傍求室域迺得翠壁玄墜環襟  
川麓構亭循性目曰居然蓋意取朱詞情方鄭隱徹  
牘之頃則散屨摘詞集俎之辰則聯裾協樂詞不任  
僻樂不忘憂誠希代之宏才擅古之通人也鶴耽幽  
成癖致曠遺生爰涉芳亭頓空氣想遂營蕪語用記  
名區賦曰

惟人統極含采潛靈居仁作靜縱化通冥交譁即昧接  
逸苦醒迺有佇情丘壑結意園林聯芳襟于安石踐幽  
踪于管寧寄丈人以怡志托傲吏而遺形俯蘭洲以命

記緣蜀嶺而著經是皆臨物以取適亦因勝而流馨爰  
瞻斯宇業々停々前控西湖後帶南屏六橋通碧雙峰  
送青盤坤方之室軸依營室之華星列垂雲以為戶羅  
修椽以為檣草入簾而舒綠泉穿幕而呈令蓮奪花以  
長麗普移春而不零蘭香散麝松濤震霆葳被九畹樞  
薄三寘捋椒實以祛穢采精苗以引齡矯覲雲翰俛玩  
沙禽薨々軫々嚶々霄鳶較翎于鷓鴣洲睢叶和  
于鶴鷁屬鷓晈畫奮鷓鷄宵鳴移鸞巡簷而覲客玄鶴遠  
砌而隨人復有白孩黑鰲蒼鼬黃麕貓獬狝歛而據穴

獼猴蚶螺而經林麋擇邃以陸梁驅居曠以橫行仰見  
飛崖躡巘岵嶽嶽峯縈迴九曲積疊千層俯觀靈巖秀  
洞嶢然天成礪礪硤硤巉巉嶮嶮嶮嶮嶮嶮嶮嶮嶮嶮  
若玄宮之四起猶青蓮而長生晴則秦風西至旭日東  
升萬象在望皎然以興雨則蘇隄走狸葛嶺出雲星日  
蔽耀雷峯避形梯萬松而莫上指三竺而無憑若夫東  
引青波南望錢塘西通虎跑北揖初暘矚劍門之桃花  
羨孤山之草堂縱四顧之無極達一嘯于蒼茫時或取  
魚為俎采菽為豆自坎齊陳灑離支奏于是集賓僚叙

故舊跡飛巒启重牖車馬喧闐瑤璫擊鞞延賞良辰盤  
桓芳晝飲不執礼樂不偕時或酣而佳或奔而嗤或倚  
或坐衣冠參差有凌虛以娛志有探幽而怡思有倒幘  
以調歌有臨流而賦詩投壺博簞藏鈎圍碁雍容上下  
命爵傳卮呼五白于一擲決百戰于斯須頽然而卧蒙  
然而迷曾不知天地之為廣與日月之有推移雖古荆  
臺之遊雲替之馳會稽探禹濠梁觀魚樂則樂矣亦不  
能旦夕而有焉若乃公驂暫駐案牘輟書遊駢罷騁亭  
月長虛往來之不常任去住而自如激流泉以濯纓乘



飄風而振裾拱北極而思君念西涼而懷廬道援周孔  
文述劉徐進抗匡衡之疏退驅李耳之車馭萬化以容  
典翔千仞而躑躅人知斯亭孰識其居人知斯樂詎知  
其餘斯則公之衆石也而非賓客所能與哉

岳陽樓賦

并序

李瀛

丁丑之秋余客巴陵郡守黃侯翼設宴于岳陽樓酒  
既酣侯洗觥揖予曰古今達人勝士登遊留詠者多  
矣願皆五七言近體而未有賦若有待于公也余固  
辭不獲乃倚檻延佇援筆立就酣墨潦草情景因盡

曷敢當衆賓之一處乎

巍乎鉅哉斯樓之為勝也枕巴山面洞庭俯鼃鼃瞰川  
靈卑九霄隘八紘應翼軫于咫尺接衡巫而與平波濤  
撼之而不動君山對之而為屏曩余閱圖經而向慕今  
始艤舟而一登翩逸思之浩發欲跨鶴而上升曰登高  
而作賦非賤子之所能且夫豫章滕閣九江庾樓黃鶴  
奠諸鄂渚疊嶂峙于宣州皆天下之雄構詎斯樓之可  
侔極百仞之孤高肆萬言而難述聊凭欄以縱觀忽變  
態之層出合青草湖名與雲夢滙洞庭而為一倏朝暉而

夕陰滂沃天而浴日突中流之青螺乃有如乎黛髻眺  
黃陵之遺宮望瀟湘之遙烟鴈傲、以南度鷗娟、而  
暮還吊皇英之二妃泣碧川之潺湲帝蒼梧而不返留  
叢筠之淚斑憶牧羊之蛾眉寄龍宮之尺牘擊橘樹而  
啟扉露紅粧而駭矚誦高唐之麗篇歌湘靈之妙曲淒  
楚調于行雲鏗瑟音於佩玉杳魂夢之徒勞何大雅之  
能續事荒誕而靡經非君子之攸錄躋范公之名言謂  
江湖典廊廟矢體國以忘家故先憂而後樂叶倘登樓  
而念茲庶有警于不肖客巴陵而訪竒睇飛甍以舉觴

仰希文之清風猗山高而永長嗟滕君其溘逝垂善譽  
于湖湘樓以文而增勝文以樓而益彰欽先民之懿則  
睠君民而弗忘采渚蘋以荐潔擷汀芷而懷芳指九淵  
以為正雖留滯其何傷諗登臨之志士寧無感于岳陽

玉屏山居賦

俞允文

夫何崑嶷歸巖而寡儂兮挺孤秀於平臯璠玕琪之燦  
炳以遺照兮聳修屏而建標面文嶺之崒岬兮帶二谿  
之淪坳二谿文谿武谿森鬱蒼之菁葱兮掩霞芬而上交託荆  
豫以曜質兮應斗極以示兆固缺紀於長篇兮亦抗竒



于近郊伊濬哲之攸止兮肆編茨而搴茅葺芳槿于扶  
 援兮羅穹岷于軒橈豈取路于華閭兮每收聽于林巢  
 陋區中之委曲兮獨延覽以逍遙山盤盪以錯峙兮象  
 瀆淪之涌濤條氛岷之靛黷兮羌近失乎岑藪泉濛  
 其飄灑兮鬱翠霧于曾霄鳥謹鳴而啁枝兮猿淒吟而  
 擁條送流月于秋渚兮覲升陽于春翹乍容典而休精  
 兮佇惠風以自陶頤冲志于典墳兮滌煩想于喧囂漱  
 乳竇之積液兮咀瓊芝以為膏循四序以為則兮混萬  
 族而不忼固忘已而自適兮匪違人而后高匡匡智貞觀中至

廬山過異人曰此陰山也不別谷而遙興兮度廬度隱  
 如玉山遂詣玉山果得道焉

山偃蹇于巖椒應真唐武德間僧道信飛錫  
 結庵于潮山通天巖飛錫而冷

冷兮瑤晉永嘉中有王子瑤者修煉于玉山滅景于寥：苟涉無而反經

兮固狗有者之所嘲諒伊人之濬哲兮遵中和之所操  
 求昔士之所迷兮咸永逝于重幽泯心跡而齊同兮選  
 自然之至要聊援翰而宣詞兮庶揚蕤而靡彫

卜居賦 徐應雷

登高岡以四顧兮何域中而非吾土慨濁世之塵勞兮  
 曾不可與偕處願長往而獨立兮身飄飄其輕舉念婚嫁

之未畢兮返余步而延佇雖浮湛金馬之門兮寶厭  
承明之廬京塵坳堞而襲入兮素絲荏苒而澗如嬰沈  
痼而弗瘳兮抱慰賢而弗舒陟吳山巔臨長洲兮芳草  
摧而道如干旌絡繹而在郊兮日莫憧々而不虛黃鵠  
離哉其不可追兮絕四海而遵渚畫一曠而夢無涯兮  
放志意以自娛神恂恍而上升兮捫青天以摘白榆帝  
高尻而覘聽下兮雲氣皓曠而曳婁罡風烈々吹我寒  
兮肉身惟怯而不可尻涉流沙以濟白水兮登崑崙縣  
圃之有無三老贈我以一丸兮再拜欲餐而躊躇鷓其

東而峨眉兮歷棧道之崎嶇五嶽芝菌其萎兮有癯者  
過而不取投長竿於東海之外兮珊瑚叢蔓而不可斂  
六鼇戴三山而下上兮颯毋敢騰震盪而不可廬秉禮  
樂以行化九夷兮又不禁傑侏堯離互作而烏々雞達  
人無適而不可兮吾不能遽忘桑梓之虛去去不忍遠  
兮歲時往返而游衍挹長公之高芬兮種橘千棵剌棘  
為枿青黃雜糅而文章兮犯嚴霜朔吹而逾爛竊穹亭  
于樹杪兮標楚頌而得所願耽寂寥而私自憐兮誰與  
共此燕々造物之典遊兮漁樵之典伴探洞壑之宵冥



窅窅兮出而憩磐石之研：澗瀨雨歇而淙：兮山寺  
鐘鳴而投一飯野人勞余以紅友兮浮太白而無筭叅  
太毓而習靜兮采芙蓉于天半恭承孔聖之祐貺兮既  
霍然而病已又申錫之以麒麟兮徼福施于孫子炳名  
香以滌慮兮漱寒泉而叩齒采茶及其旗鎗兮白瓷瀹  
之瀾：遂初衣而薜荔兮雜蘭蕙典蓀蒨願隨毛萇以  
探張公兮及林屋而餐石髓登縹緲而御長風兮七十  
二峰白雲莽：而不止于是返而宴坐日月曠朗酒至  
自斟詩成自賞間有幽人兮如清風颯然而至歎曰先

生五湖長也

明文海卷三十一

明文海卷三十二

賦三十二

居處四

太白樓賦

陶允宜

餘姚

黃宗羲

編輯

萬曆元禩歲在癸酉會稽山人將再上於春官乃與  
 胡先生何文學者同舟而北九月九日遲于濟上登  
 太白之樓山人慨然而嘆先生文學曰吾子之嘆蓋  
 嘆魯也山人曰樓以太白何更魯為二客曰吾聞登



明文海  
卷三十一  
作賦盡賦之山人曰唯

惟重陽之佳節兮想龍山之舊遊  
廼舍舟而就陸兮囊  
茱萸以消愁歷三橋之屈曲兮步太白之高樓披雲日  
之蒙翳兮據天壤之上游奠疆域于徐兗兮應列宿于  
奎婁背渤澥之巨侵兮面秦岱之崇丘惟東嶽之巖巢  
兮帝闕而糾麓蜿蜒而斷續兮水委蛇而迸流闢岡壟而原  
陸兮表任城之名州總輿圖之棊置兮羌特拔其無儔  
矧茲樓之鼎建兮擁睥睨之上頭超靈光之窳窳兮聳  
嶽雲之飛浮對大庭之雄庫兮入玉虛之淒颼嗟往者

之不作兮胡斯名之久留于是先生目余而問曰甚矣  
夫魯國之多材也——聞羲皇畫封自彼魚臺軒轅壽陵  
石象崔嵬少昊宅其東畔陶唐祠其西隈漢皇受命而  
璇壇秦皇頌德以珉碑此帝皇之極盛咸璀璨于常彛  
次之則有伯禽疏封僖公獻馘剡子紀官衛侯徙國梁  
孝躡躑于棲霞魯共拓基于故壁此侯王之已事亦照  
耀于方冊其人則有展禽和惠叔孫禮儀韋賢燕翼踈  
廣知幾黃石方平起仙靈而爭竒丙吉魏相握鼎鼎而  
敬蜚其豪俠則有陶朱別業孟嘗遺署射戟賈溫侯之

勇闖雞奮季郈之距蔣生緣開徑以養高朱雲因折檻而起譽彼千載之名流蓋宇內之人傑何影響之悠々獨李君之烈々言未竟文學起立獵纓而前曰先生之旨謬矣夫切業之於文章果孰暫而孰久矧富貴于一時視吾身於何有若帝王之餘踪與賢聖之陳迹六音倏以無殺五采黯以無色獨篇章之為用比雲漢之昭回躁者遇之心懾怒者覽之顏開朔風雅于三百迄漢季而中哀恣六朝之綺靡逝頽波之莫迴迨武德典貞觀生氣絕而復蘇自匡山之崛 揮遠駕以長驅挾風

霆之恠鏢召神物以憑扶爛筆端之蜀錦吐頷下之驪珠走一介之布衣奪赤幟于中原搜大澤于雲夢鼓長流于荆樊擬東山之安石號太華之青蓮入江淮而容與探齊魯而流覽繫四明之狂客主當代之玄言忽傾蓋其若素締分誼于諸昆當其登斯樓也吐吞滄海笑傲乾坤弄初陽于日覲拉真人于天門挽長虹而為帶呼明月而可捫偕浮丘與安期將稅駕于崑崙視礪礪與大沫羅几席之兒孫于是撫劍譚詩對酒論文詞高白雪氣薄秋雲策黎眉於絕境

黎眉見公詩

拜堯祠于南濱



弔石人之長跼覽歌舞之繽紛咏半月之崇臺揚陶公之芳聞勒貞碑于廳事記風俗之法

已上皆公任城事

將翺

翔于物表豈齷齪于人羣爾乃單騎入都明皇召見中夜披衣詰朝賜宴踏花萼之危梯醉芙蓉之別殿鼻齶勦其如雷目閃閃而為電忽奉制于俄頃馳詞鋒于百戰決江河其不停紛綵色其相絢力士為之更衣太真為之捧硯天子神驚宮人色變分宝炬之華輝歸金盞之深院爾時廐臣御馬大官進饌五侯執鞭七貴捧罍爭趨候其中消或十日而不面獨賀監之深知尤故人

之戀：于是免繹改觀東蒙生色汶濟洋：徂徠奕：

惟茲樓之寵光迥千門其疇匹悼古昔之塵埃如溝中之餘瘠子胡舍其長而競其短知其白而守其黑也先生憮然目曠面赤欲發一詞噤未得出山人恐文學之矜而先生之屈也徐而應曰子謂樓之得名于白耶抑知白之獨名于樓也夫景星之芒孰與夫日月之光世主之褒揚孰若夫夷夏之蒸嘗濟固魯國之域而吾夫子之鄉也闕里閔其閭闕曲阜峻其室堂顓邾列其廊廡齊宋衛其藩墻萬古傳其子弟六經煥其文章故入

其門者多至于三千治其業者並振于漢唐猗謫仙之殊質挺光岳之精英或取裁于狂狷可庶幾于中行使沉潜于彥聖綽左顏而右曾若子輿之芳軌將以爭衡然而瞠乎後代眇矣孤生身不逢其輟轍足未履其門庭訪相如于酒壚寓子雲之玄亭肆風雲之變態諧月露之音教心忤而獨賞神恍其靡寧矯鷲鳥之雄飛阻潛龍之遐升故中年竄于夜郎末路極于塗城既保全于郭令復訣絕於陽冰坐清江而撈月托駕海以飛鯨類莊生之幻夢甚王粲之飄零蓋美玉而靡

琢亦鍊金而弗精是可以快雄談之資斧而未可以標後學之準繩也是可以競溫泉涼燄脫絕于種類而未可以並太和元氣布濩于絃絃也念斯樓之亢朗樹城上之孤鶩鷹隼窺其戶牖燕雀掠其丹青夏炎而觸日寒颯以飛靈延金甍於八月送玉魄于三更涉盛衰之相禪觀往來之無停所遊者江湖之思客所藏者騷墨之篇銘稀西崑之琬琰乏東壁之瑤瓊杳清廟之敦彞寂武庫之甲兵齊崇隆於紫閣謝廣邃于玉京奮峻嶒而獨出悵危險而難憑較地位之高爽典教價之



重輕歸樓名于太白何比擬之中情視宣尼之矩步猶  
雲物之去太清願往跡之紛沓亦奚暇于他評于是先  
生既喜文學悅服哦天姥之高篇歌襄陽之艷曲倚畫  
檻以開襟俯清流而縱目傾竹葉之新醕向東籬之黃  
菊聽舟子之張帆足將行而欲縮倘倡和于長宵願歛  
衾而就宿

歸來堂賦

朱應登

緬茲堂之攸建兮肇錫名曰歸來欽嘉遜之時義希明  
哲之所懷繫堂中之人兮固臯契之上材遭昌時以振

奮兮緣天路而徘徊鬻龍虎之文章兮呈道德之瓊瑰  
信中情之好修兮矢貞志而靡虧歲暖；其將暮兮芳  
烈；而彌滋既姱麗而鮮傳兮要非時之所宜嗟時俗  
之難周兮衆比同而恥獨謂忠信以為頗兮指潔清以  
為濁亮恥獨亦何傷兮患偽滋而真惑觚可破以為圜  
兮繩可引以追曲何孤行之熒熒兮廼惴；而棲木彼  
烈士之耿介兮務矯俗而狗名逢忠諫以捐軀兮讓感  
遇而戕形和重剛于獻璞兮由構難于結纓胥肆直以  
伏劍兮種成謀而蹈刑遷逢怒以下腐兮陽上書而自

明然皆信道以昧權兮故罹殃而速傾惟哲人之先幾  
兮揆進退而適當也知受生之有涯兮惧寵祿之踰量  
也進懷憂而畏諛兮退將從吾之所向也返初服以徜徉兮不吾知焉其何病也覽衆女之善妬兮羌佻巧而多言孰蛾眉之可恃兮沈憂積而罔宣誓淪謝以游衍兮雖貧賤而不遷竭馬知于銜轡兮殘純撲于犧樽固莊生之所誚兮寔繕性之本源庶永言以奉斯兮縱九死亦何難誦同人之先號兮覽道家之明忌諷武功之悔過兮遵宣父之求志宵炯々以延佇兮候將旦乎于

邁抑吾生之不罔兮曷駢贅之為侈相宇宙之無窮兮傷寓形之不長不撫壯而策勵兮恐修名之不揚鴟鳩鳴而陰至今白露隕而為霜心感時而增惕兮目睹物而臚情吾將遜堯舜使前驅兮揖旦丘而隨後要回點以為徒兮謁羲文而占之聳巍峩之籜冠兮製委蛇之蘭佩被中正之芰裳兮襲溫恭之荷衣闢文藝以為囿兮崇典籍以為臺飲予馬于義津兮晞予髮于仁堦續小山之招隱兮歌泌水之樂飢望咸池而振步兮遊閭風以陳辭撫吾躬其有獲兮顧外此將安求信榮辱之



可如今吾將觀之造化重曰歸來歸來吾堂闢兮層檻  
疊枿飛拱翼兮奕々恢々麗以則兮周覽八窓九垓赫  
兮風雲月露昭暎暘兮嬋娟奧祕紛埃息兮情暢意悅  
形神適兮假日永年不知其極兮

登玄覽閣賦

有序

安紹芳

紹芳子生而誕靈長而鬱志厯落崎嶇伏匿山澤乘  
春散矚登玄覽之閣徘徊慷慨悵然有感爰為之賦  
伊春陽之煦々兮漸淑景之熙々羨萬卉之葳蕤兮欣  
苾芾其俱馥爰憑高以縱睇兮暢形神其若怡山龍從

以葱鬱兮水滉漾其瀾々繫白羽之翥々兮惟玄鳥之  
飛々瞻停雲之旖旎兮倏爟隼其若垂披條風之温燠  
兮澹飄忽而吹衣覲麗景之宜樂兮胡躑躅其憂思哀  
時運之未逢兮悼畏路之嶮巖何述邇而偃蹇兮徒蒿  
目而歔歔聊憑欄以徙倚兮翫杜若之菲々望美人於  
天末兮安得解蘭珮以相貽嗟晨晞之易邁兮適晝晷  
之遲々感時序之儵忽兮形若稿而自嗤頽人命之易  
衰兮俟河清之幾時悲青歲之無聞兮惧朱顏之或馳  
譽往轍之既蹶兮猶來者之及追彼康莊之未騁兮德

騷見哂於猶狸搏扶搖而鍛羽兮威鳳速謂於鷲雞志  
固匪衆之所闕兮又奚恤乎世譏寧臯俗而尤人兮甘  
棄置其若遺恥窮途之涕泗兮差溷跡於滑稽獨低徊  
而慘惻兮悵中心其若迷苟天命之或然兮雖戚其  
何裨澗阿可以考槃兮衡門可以棲遲諒剝復之相乘  
兮肆秉志待期遵聖哲之遐軌兮詎困窮而或虧

煙雨樓賦

有序

王文祿

煙雨樓五代景陵王創于彪湖西廢我明嘉郡守趙  
公復建于馬當湖中南曰鴛鴦同一湖也壬申秋仲

重葺經畫本兵憲劔南沈翁且賦之王生文祿步韻  
隘塵埃之卑棲兮遡彪湖以盤遊振雜佩以凌虛兮渺  
瀛渤之十洲漾白雲之英々兮豁都之瓊樓漱三光以  
灑兩間兮漾一碧于四周移花萼于相輝兮縮海湧  
之虎丘旋癰而如壁兮湛滌洄而不流總水輪之乘載  
兮連大地之俱浮々生洞悟能幾兮畫船紛泊于水滸  
賸有先憂後樂之希文兮將無吸海噴珠之李杜靄輕  
儕而凝烟兮魚龍吹沫而霏雨瑩粼々之水晶宮兮倒  
影青天而作侶四時朝暮之靡恒兮皎月沉而日麗儵



烟雨而忽開霽兮水氣溢而互為晦明肇景陵之創兮  
繼馬當而再成崇陰散而卿雲興兮累層臺而飾丹雘  
恍若空中之樓閣兮倬銀漢以呈章樅萬卉以待陽和  
兮鄂韡其芬芳壯東南之砥障兮擎玉柱而跨金梁  
想卷阿之伴真兮歌喜起于明良森嶧桐于高岡兮招  
苞鳳以來翔洗兵以淨寰宇兮烽烟淡其永息霖雨之  
潤膏兮鴛鴦盪而隻集湘靈鼓瑟兮馮夷按節飛仙至  
止兮亦不怡懌錯蘋蓼之紅白兮埒梅菊之早遲及滄  
桑之未變兮爭硯瘠典腴滋稼穡維寶兮胡寧茹芝磴

級霞蟠兮迎風歷茲凭闌悵望兮曷殫遐思豈玄圃暨  
閨苑兮盡艸瑤而樹琪沍烟雨化甘露兮一滴甦乎疲  
痠嗟彼勤農兮病于夏畦北懸金臺新極兮五百昌期  
雲臺麟閣兮際雍熙

藏拙亭賦

陸容

陸子稅駕南都備官逾月賓客日至絡繹不絕禮或簡  
於逢迎物或嗇于饋啜啟居從容言論迂濶然而上不  
間指其驕下不聞病其褻稱譽風聞謗議景滅始訝而  
求之曰吾其非故吾也耶兼人乎未能炙手乎不熱而

人之遇我何遽別耶豈昔者昂昂類傑而今屈其節諤  
諤類訐而今結其舌耶抑脂韋圓滑而匪昔之易缺垢  
污蒙蔑而匪昔之易涅耶將易誠以譎易別以劣而滑  
稽以為哲耶茲數者殆非也彼其羣妹爭寵粉黛羅列  
市人爭利錐刀瑣屑於是乎蛾眉見弃流涕哽咽良賈  
不售甘心折閱昔吾居榮寵之地蹈殺利之轍既不能  
夤緣以媚附又不能周容以交結而獨株守一隅以求  
自別是宜鼓吳蛙于積潦吠蜀犬于飛雪也今幸而投  
諸閒散脫去羈紲挹鍾山之靈秀守高皇之宮闕下無

譏議上無請謁神完而体舒心逸而志悅况乎花木媚  
我以媚妍亭池假我以清徹經之在御壺觴亦設可以養  
東漢之節義采江左之高潔徜徉其間用藏吾拙則  
吾於世亦何望之缺邪乃歌曰鶴鶴未化安一枿兮狡  
兔已死塞三穴兮有美斯亭可以藏吾拙兮又曰黃鐘  
鏗兮醜塊錢兮綠耳飛騰笑跛鼈兮命之不猶彼胡嘗  
吾拙兮客有聞而和者曰犧尊青黃木之孽也海圖波  
濤帛之裂也彼既失性無寧守吾之拙也陸子于是得  
意忘言失聲一唾遂書其事

于斯亭  
之稅



後長門賦

王樂善

排太紫以通籍兮，盼微靈于天孫。肆蒙幸于嘉采兮，猥代匱于下陳。惟女子之事主兮，繫載德而載色。緬坤儀之述宣兮，敢淄蠹而愆則。叩奉君之清燕兮，頰遂君之壺教。通貫魚于小星兮，寧屯膏于煬竈。睠二姚之遺矩兮，宵振珮于雞鳴。冀蒙成而有相兮，懼憎子以同夢。陽春之華滋兮，日鏡融而駘蕩。思暉煦而拍兮，誓萬年其可亮。詎福逾而愆積兮，曾何容于擢髮。廓天覆之並包兮，尚蒙恩于紫闥。唾咳濃其泆忍兮，誰可使為束縕。

戴高天而循墻兮，日媯妍而待晝。低羅幙之瑩煌兮，襲蘭茝之芬馥。緬金屋之前模兮，君不偕而忍陳。援雅琴以銷憂兮，寄幽臆于新聲。嗟遠君而誰為虞兮，中操縵而涕零。豐隆殷其軒馘兮，驚紫駟之臨造。九光照而隱約兮，乃宵行之熠燿。悅侍于中宵兮，承恩借而薄從。矧中道而驚寤兮，耿蘭炷之熒々。涼露隕于枯楊兮，訝閑庭之秋早春。然頽于閨風兮，應清颺之基峭。明月皎其流輝兮，照孤影于空堂。蟋蟀鳴于東壁兮，怵壹鬱余排傷。歎尤悔之歷々兮，冥附心而自悼。維聖明之雄斷

兮敢希恩于回照願從一之孤悰兮萬折而朝宗即著  
簪之終委兮亦沒世其有徵詞緣情以詠兮分詎白  
華之敢托望九乾而抒悵兮庶有取于臯鶴

綠憲賦 王樂善

夫何一美人兮蹇獨留兮中谷衆芳咸有以發舒兮曷  
獨為此局縮峯盤兮石如玉撫嶽峯而愁春陽兮翳  
此樸遯葺木蘭以自藩兮延薜蘿而屋之嗟坎壈而無  
家兮紉蘭茝而服之襜攝葉以儲典兮謝鉛華于曼睩  
捫鬢髦而晞惠風兮噫其遲暮紛余既有此修姱兮惜

違時而莫畜踉位悄其無侶兮來明月而往復悵婉孌  
之調飢兮日盤辟于蕢菜緝江離以充虛兮托遐情于  
采綠蕙性綽其孰憐兮冰心齋而孰悟芳澤具而孰容  
兮控幽悰而誰告日疊兮習其過中兮迥去我而不偕  
鷓鴣送春以春歸兮青陽易而恢台紅芳鄂其歲粃兮郊  
從風以紛飛余萎約而紆軫兮重抽思于芳藹之變  
哀傷韶華之易零兮時一往而不來肆冰泮以桃拖兮  
俄驚心于標梅羌送目于行雲兮愴怳而羞自媒豈禔  
躬不逮古之人兮抑膏沐之未諧也將我辰之不泝兮



果蛾眉之多乖也。把平蕪之綠色兮居快。而徘徊氣  
輾轉而靡盬兮心絳結而不開。縹綿之相屬兮浩渺  
渺而無垓。藐冥之不可測兮來蘇。而彌恢。紕煩寃  
以為讓兮翩蔓。乎不可裁。四序冉。以適遷兮汨莽  
莽與靡草以同。灰老連。而漸迫兮浩惆悵而傷悲悼  
年歲之不吾待兮。豈女子之善懷。吾將遵微行以紓天  
紹兮睇鵲巢。居鳩也。俯新川以夜憂兮。又浮陽之並  
浮也。鷓鴣倉庚曾何知兮。鳴上下以相求也。余獨為此  
孤馘兮。如石田之不有秋也。生而願為之有家兮。得無

為二人憂也。質。隨波靡屆兮孰是人斯而不緋之舟  
也。苟橋運寔為此隆施兮。固非人可戚而仇也。倘力命  
之不能迭而勝兮。又何庸計去住而辨夷由也。重曰。閔  
彼王睢在河洲兮。婁此泚姬滯樊丘兮。冥。飛鴻羅無  
因兮。鼠肝虫臂順所投兮。風篁月杼以自謀兮。秉遺穗  
滯食可侔兮。鄰燭分輝聊淹留兮。漆室含恤何當瘳兮。  
臨風抒悵畔牢愁兮。妾運乘化與造物者游兮。我思古  
人俾無訖兮。

假山賦 黃猷吉

臨安上郡都會名區覽山川之佳麗開高堂之畫圖湖  
蕩漾以浮碧通太液而東注山排捷以送青接天台而  
南去羨勝地兮如斯供主人兮樂胥時肩輿而短棹收  
湖山於肺腑侶麋鹿與魚蝦忘形骸于塵宇頽歷覽兮  
不足乃收拾而歸典移湖山之萬頃列咫尺之盤盂一  
奉太華一勺江湖峰嵯峨兮聳百尺而有餘壁嶮巖兮  
懸數仞而難踰藏虎豹之阿丘而風雲時噓列神仙之  
洞府而烟霞晝居竒葩異卉映林壑而爭舒好鳥幽禽  
隱深林而對語勢曲屈以勾連香深邃而莫知所如形

變態以恍忽忙兩眸而難為有無胡斗室之經營生無  
邊之佳趣如入乎蓬萊之三島天台之三萬六千丈而  
一遊一豫奚羨乎十里之蘓堤三百六十之臺榭而以  
遨以娛此假山之大槩而難紀其餘乃若紅笑綠言暉  
映齋閣春光富也槐隔日而生蔭松過軒而度涼夏陰  
濃也風瘦木而石出月庭寒而色深秋容淡也雪花細  
綴而石膚斑梅香暗浮而木生氣晚華新也此假山之  
真景視湖山兮何如至若鈎簾憑几挹青光而琴書徘徊  
瞻眺窮四際而長盱奏笙歌兮聲細飛羽觴兮醉呼



入丘隅兮覓句撫卷阿兮迂徐此假山之真樂彼六橋  
三市兮何殊嘻噫吁昔湖山兮帝王所都茲吊古今滄  
桑幾枯觀古今之代謝兮良可慨夫彼長安之皓首兮  
將何為乎維假山有真樂兮毋俾荒蕪苟厥心固歆羨  
兮奚適匪吾

燈市賦

有序

吳伯興

今王正月燈會上元當年運之清夷藉聖明之光飭  
其晴開甲申輶九市而出游冶之百色也則若法雁  
吐珠神龍啣燭金標轉力寶界迴新于時卿士約隊

且觴且咏小人密倚或鼓或歌予小子既自公而多  
暇疇有政而必聞乃邀好友減人從以微筵弛冠裳  
而擘袂談深佐酒夫亦極其致矣而山陰雲間清人  
興寄各獻所儲向如也余唸而序之聊取機于映賞  
因緣生而發悟蓋太平之樂事無涯一瞬之新懽易  
尾媿予官之淡、當纏薇之晚、滌滯慮于榮觀敢  
效陶歌將追歡于良士并佐虞箴云爾

睽神都之寶勢承造天之玄居樹華闕于齡霄鬱益益  
于層虛金臺值乎銀潢玉河睒乎歸墟悅瑤宇與嵒嶙

酌允鑠而樂胥祀皇德于周成豈其鮮終而僅有初是日也氣眼葭琯星正春辰青陽矜乎冲和太皞揀其威神物孕寧而改舊人逗機于若新永將泮以微流氣無肅而有仁聖天子登三緯地乘六御天考月令之所宜究休佑之所同第從臣之椒頌採太史之觀風將以望杏瞻蒲敦耕勸農爾乃鳳蓋參麗象輦霆較郎將鼗而虎戟交臚人圍而九賓重究濟之皇儀展穆之帝容藩國要荒辨等以八璧羔皮帛各獻其贄乃羨羣后于東除輟機宜而問質曰萬物之爭揚春氣喜而自生

倘民黷之未捐何以稱陽節之淑清爰抗稜而布德蒸霞液而賑普荒束帛欲賁乎丘園諫鼓新開于明堂民望如草而澤如春優天道之皇于是皇心歡浹太牢斯鄉春風人其樂愉化衍而流遐驚天區天子乃肇年穀之豐登羣有唇而偕樂開節假于黃扉引春光而駐脚時則景星煜爰璨于蕊焱風散鬢雲英間錯紫磨素雲十色圍空天門呀然混沌欲鑿日黼而上春臺筵窠而開油幕欲接通天之梯不閉姜蕤之鑰闔縷之香繚繞龍川之蠟方灼儼翠筑之葱菁并蕙華



兮交萼出珊瑚于鉄網問隨侯以歷落想流珠于丹灶  
現莊嚴之瓔珞燦乎若五金在鎔翔陽激豔而冲融  
眈乎若神漢湧璣畝喬雲以岑靡晃乎若白榆懸曉而蕩  
銀波駐芒穎之紛拏靈乎若僊掌巨靈之顛負闕觚瓚  
而紛聚至如紫宮列宿環彩景彰虹霓迴帶激日流光  
栽菡萏于倚雲噴梨花于霞觴綴碧紗之火枣舞星球  
于錦襜簫韶奏兮鼇海繡蒂列兮蛾房蕙酒萬斛兮滴  
珠琲雲炮千丸兮磨霓裳望觚稜之金爵起蓬萊于中  
央目眩轉而欲迷依天表以洋洋若絕地之行難人顧

影而聳軀浮十步而一息拂埃壒而載驅各踈跚以結  
襪擬飛蝶之栩々井里綴鉄橋而如織門戶光靈池于  
有無等風食于魚子走步帶于青驢競作樂兮宣馬上  
有才情兮誰匿諸統東華之樂事頌堯仁於康衢乃其  
場開九市貨別三條闐城溢郭東西叫囂裂繒結綺拋  
彈飛鳶狄鞮胡舞角觥絃么器品則有哥窰秦榴周鼎  
商彝瓦爵銀瓶金蟬玉貂書連于屋牀疊通闐驥子魚  
文鱗萃表標鉛鉛銅錫麗于星寶喙琛幣湧如潮熒隆  
隆之火井吐金景兮雲歌燒栢子之銅爐織永室之鮫

綃青珠向風其欲乳瑪瑙日而轉驕騰酒車以斟酌  
齊宮商于雲翹豈分艷于十三樓漫爭勝于二十四橋  
蓋如寶坊之布金烘六合以為窰爾其冠帶鱗起駮鞞  
憑輶控寶鉸而纏金羈綴錦帶而懸吳鈎履躡兮飛雲  
鳴佩兮環球比懸璃之穴目類芙蓉之照秋千唱萬隨  
颺曼延于于喁：與雲流連跋躡魚貫擺榻絲牽鶴蓋  
鳶吹眇若騰騫乃出金而擲壁進舞市而御歌宮發皓  
齒于哇咬娛密坐而搗鏞莫不羽鬢犀紕露紉練恰趾  
豸轉增芬澤微發既僂侶而便娟亂芳鬱于五風亦微

眺而連跽等金石之齧同躡蹠兮馳帶醉酣兮曲終華  
燈錯兮鋒霄微投詩賦兮殷層空想夫儒生授學樂列  
絳紗楚姝委潤舞歇章臺行：閤：洙泗步趨彭：鏘  
鏘韓媧偕來和其光而同其塵羣不黨而矜不爭庶幾  
似之其在斯哉是以五宅夜游淡蕩諸峰之雪千炬圍  
燭流連隔水之烟脂冷韓號空餘百樹花燈橋駕廣陵  
渺矣五雲仙樂曷若干官休沐萬井笙歌賜脯樂豈接  
羽擻籥凌波之子繽紛姑射之仙綽約景得人而增妍  
人因景而欣躍亦何異乎榮露騰軒蕭雲掩閣覲王母



于崑墟要帝臺于宣嶽寔仙都之陸海文成五利之所  
不能托也雖然人生有涯苦樂無期隨寓皆客主者其  
誰愛流成海趨而赴之過眼空華駟不及追彼夫水觀  
之棲結蜃之市金人海藏未可殫窺清歡已矣良夜何  
期主苟儻然而不緇客亦何傷乎隨寓而隨馳倘其畔  
援而欣羨或難事而易悅將無始之趨未趨斯有終之  
相難閱吾將歸山河于大定悟空明于一切九衢之中  
千計四照之花不折慧日曜于重昏法雲蔭于火宅固  
靈境之常然豈一夕之靚絕夫堅冰履霜尋木栽孽聖

天子樂不及荒取戒蟋蟀故上下式燕且盤豈蟪蛄之  
掘閱淨域非遙兮夏不知乎春色之所窮以矢其音兮  
吾以觀乎中曼而彌烈

瀑園賦

徐勣

大中丞南公家本渭濱園臨潛水買山得瀑築館開  
林種樹蒔花看雲聽鳥多靈勝泉極蜿蜒輞水不足  
狀其淪漣漢陂詎能擬其澗澹公方結志巖廊馳神  
藪澤寫圖作記托興抒懷爰屬操觚敢辭獻賦

溯雄閔之迤邐逕清渭以滌紆山蟠二葉兮達嶠冢幾

千餘里水合灞滻兮環周原數百其都畛域壯天府之  
形勝提封表三輔之黃圖聳玄象之峰屏若黛滙酒川  
之流沫如趨哈岬竄窳宰嶽嶇峰夾瀆以削玉酒噴  
瀑而咳珠洪瀾飛乎千丈汎濫迸于一區奔騰澎湃滂  
沆滄瀦羣龍挾湫兮倏忽萬馬蹴浪兮須臾玉虬懸掛  
兮等巫峽銀河倒瀉兮同匡廬爰有文人瞻竒仰異就  
壤營園緣崖相地岳作賦兮閒居統著論兮樂志世諦  
于焉而輕曠懷因茲而寄芟蓁莽以結構循林壑而葺  
治施以堊丹塗以茨墜高者磴承危者棧置界接東西

之豐源疆畫南北之郊隧于是息機心兮築圃致爽氣  
兮開堂引古雲縹緲兮入洞激寒泉飛灑兮渡梁振袂  
頰亭之小閣披襟步曲之長廊比隣數舍灌木千  
章茶寮柴柵藥灶石林深淵鑿影澄潭漾光陰新詩于  
遠嶼晞短髮于崇岡爾乃跨層岑傍遙岬抵井里帶墟  
落春風長芳徑之青莎夜雨滋雕闌之紅藥餐英玩秋  
町之餘花洗竹聽寒林之殞籜蘭侔楚畹而馨香桃擬  
綏山而綽約芙蓉媚沼兮間修堤荷芡沿陂兮通畧約  
嶺松貌古以同喬灣柳腰纖而較弱樹枳類木奴之衡



種果効橐駝之郭若夫登高遠盼陟險遐觀側身崖畔  
躡足林端眈秦峙密臺之消歇盱渭流故苑之渺漫斜  
村莊之半日折危坂之九盤雉飛林而煦澤牛飲澗而  
驚湍烟鴻渡渚以嘹唳春鶯出谷而間閔秦女已仙兮  
峰自在胡公既六兮陂長閒至于析醒名齋瑩心鑿沼  
巖遠囂兮陰陽割乎曉昏樓延真兮心神徹乎灑森柿  
葉墜兮供學書栢枝悅兮借棲鳥待饁耕兮稼穡知禮  
文殊兮心性了或當晨爽乍闢朝曦未昇嵐光初散花  
霧猶蒸携益友集良朋接畸士招高僧扶筇共眺引酌

同登循崇巖之業、躡絕巘之層、傷五柞長楊之代  
謝感阿房麟閣之廢興悵漸臺百尺兮淪沒愴藍田千  
澗兮澄泓俄而景汜於崦西霞標于天末涼籟迭吹清  
飈遞發禽語爭喧漁歌互答月晚壁兮依微星縣璣兮  
旋幹瀑響洙潏兮震空山容杳靄兮排闥羨斯園之清  
幽暢遊踪之遼濶慕赤松以遨遊等漆園之曠達况乎  
天植丈人之大德帝寵元老之無疆已播勳猷于當宁  
復秉節鉞于要荒方際熙時而敷歷豈容暇日以翱翔  
綠野先開菟裘預樂身在廟堂夢遊巖壑丑正輟耒以

出萃壘乃樹棠而至雉行且為瑞世之鳳麟慎毋戀北山之猿鶴

明文海卷三十二

明文海卷三十三

餘姚黃宗羲編輯

賦三十三

感別

惜愍賦 送莫景周赴新昌訓導 史明古

秋風蕭條夕起兮白露變而為霜原野寂寥無色兮草木為之不芳嗟夫君去國而遠逝方將往遵夫行路蹇徘徊而不進兮步十舉其九願望皇居而不見兮涕浪浪而沾衣情悵惓而莫釋兮何須臾能忘之翳願忠而



慕義兮冀少伸其微志胡壅遏而不通兮曾不能以一  
試彼蕙纒與佩蘭兮宜日切乎君身忽棄捐於山谷兮  
豈將惠夫南之人覩江湖之浩浩兮紛日夜而東流馭駟  
馬於山臯兮乘艤船而下浮去故鄉之日遠兮路險難  
而多悟濟錢塘而上稽山兮踳陳辭於神禹慨聖功之  
無間兮民日用而至今仰昭回於上天兮儼光華之昭  
臨入浦江以南徂兮眷新昌之所治俗儉嗇以憂勤兮  
乃風氣之所會山寵蕤而多雲兮晝冥冥其若雨林幽  
深以行迷兮疑非人之所處虎豹穴處而咆哮兮猿猱

跳梁嘯啼溪谷蘄巖而險阻兮草莽委被而萋迷苟衆  
芳之不乏君用兮雖僻遠其何悔也羌好修以為常兮  
夫初心之靡改也昔賈誼以才見嫉兮卒長竄於長沙  
終焉宣室之召對兮語前席而忘罷叶苟其言之見用  
兮身不必在乎君側係貴寵之與賤踈兮諒由命之所  
出惟定心而廣志兮寧時俗之能從橋茲媚以潤身兮  
豈將愁苦而終窮亂曰鳳凰集於高岡兮世已見其文  
章固非時俗之所好兮然共以嘉祥托靈鳳而上浮兮  
俾翱翔于帝鄉

睽難賦 戴欽

睽難別彭子美中也矜我素懷爰稽同心辭之工拙  
不暇計矣

眇予生於絕粵兮悲斯文獻之莫徵帝復新予厥初兮  
性慳惓而顛顛悵前修予罔及兮去聖途其將日遠孰  
導予於先路兮孰驂予絜之偃蹇汨予恒若不及兮恐  
年歲之不吾留將溯流而求原兮溯江淮而無舟予朝  
挹桂巖之清露兮秋采禽華之落英晚搗車與芝蘭兮  
雜蕙蒨之紛芳嗟道周之扶杜兮上童龍而無枝彼美

人兮寫予衷而曷致之予獨慕夫古之人兮咸喜能而  
好修曠百代而神交兮豈云界夫遐陬懷佳人其不忘  
兮馳予思于海隅杳盍簪之無再兮紛予懷之縷々曰  
予不撫壯而修姱兮羗自斲其靈根也荀子芳其信無  
兮寧美人之不予親也既襲瑤華以為履兮又蘂芙蓉  
以為裳紉璫英以為佩兮結胡繩於香囊抱衆芳以獨  
處兮世寧挹予以馨香旣美人不可以坐招兮思歲修  
之莫吾予將往觀於天下兮庶蟬娟之可觀伊歲比於  
閏茂兮日正躔於壽星涼風飄々而吹衣兮白露湛々



而潛零廼朝脉驪驪于柳涯兮弭楫于漓江娑帝子之  
蛾眉兮修遠邁于瀟湘蒼梧邈而皇逝兮灑予涕泗之  
淋浪采江蘼于衡湄兮聞哀鴻而南浦嘆幽人之莫逢  
兮縹雲亭於衡之武予登岳陽之高樓兮望漫之洞  
庭孰憂樂之以天下兮羗獨有慕乎斯情因江潭而敬  
吊楚之湘索兮復悲賈誼于長沙胡壽夫之在天兮寧  
俾斯人之莫遐遂凌長江之浩之兮吊青蓮于采石泯  
鯨波之無跡兮慘黃蘆之一色予使蒼螭以翌舟兮驅  
素蚪使衛行憑夷為予鼓柁兮江妃為予揚鈴衝風定

而素波澄兮駛迹運于金陵棧予舟于河渚兮振予步于  
江皋瞻天門之嵒之兮覽秀麥之油之僉謂予其好教  
兮疇識予心之搖之予乃蠲吉以齋明兮稽靈氛之占  
辭曰兩美觀而必合兮紛百朋以相貽孰意絕代之佳  
人兮驚一見而相好荃慕予之修名兮予亦慕荃之善  
窈窕予投荃以雲錦之衣兮荃報予以明璫心康愉而  
而莫逆兮情傾倒以相忘芝蘭芬而相投兮慶予衷之  
允臧忻靈修之獲攷兮滋衆芳而日榮曰天軌辟而衆  
積登兮羗盍觀于帝京予駕木蘭之舟兮剡文梓以為

粹楫溯千仞之龍門兮宛仙槎而泛月濟雲龍之嘉會  
兮仰虎豹之九閨排閭闔而進予兮羌共披乎琅玕嗟時運之糾纏兮悵仕  
途之多舛愚者不必卑兮賢者不必尊而頭鸞鳳伏而不鳴兮鷓  
鴒羣而翱翔黃鐘擯於鼙鼙兮卷旣進而雷鳴哀昊天之不吊兮恐靈修之  
數改雲蕭艾而縑苞莠兮孰更傲之以蘭蕙憶荃與予成  
言兮曰脩正以俟時也守靈龜而靡它兮罔與波而推  
移也苟予行其珪璋兮長頗領予何辭也寧溘死而流  
亡兮罔啜伊嚙吮之為也予箴此言乃可服兮懼歲序  
之如流方翊荃以為正兮奄棄予以遠遊予固知枳棘

非鸞鳳之所棲兮恐靈修其日遠浮雲蔽而白日陰兮  
孰邁夫忠之蹇兮羌皇輿之輻兮哀民生之多艱衆  
貪婪而競進兮蔽罔紹守南山伊予荃之清修兮寔蒲  
民之有穀孰窈脂而宜粟兮孰矜寡之宜獄悵美人其  
將別兮凜秋風之蕭騷衆芳萎而搖落兮山容淡而寂  
寥鷓鴣雞啁哳以悲鳴兮鴻鳥飛而南翔感萬物之淒列  
兮增予心之憂勞余將裁雲錦而為衣兮鏤明月以為  
璫雜蘭蕙以為珮兮遺予美之煌兮予恐波濤涵湧而  
雷電以風兮蛟龍起而制人解干將以相贈兮披燦爛



之星文哀予心之罔極兮悼美人其將日遠羗信宿以少留兮聊逍遙而游衍白日留其不淹兮愴予美之將行心搖々如懸旌兮憂耿々而如醒予固不難于為別兮恐春芳之遲暮森江海之無涯兮思同心而共渡悵美人之莫予留兮遐不披乎琳琅表心箴而未敢言兮羗何日而可忘紛既莫致予情之總々兮聊陳愚而盡言孰非蘭而可佩兮孰非善而可傳予獨惡夫時俗之諛諛兮徇規矩而改錯紛枉尋以直尺兮競雷同而苟非予行信娉練以庶貞兮致予之坎坷予何傷芝蘭之

在幽谷兮不以無人而不芳荃其冰雪以滄兮金玉以為搵曷求美於天下兮而蛾眉之不遭離曰黃鵠高舉羽儀皇兮彼其之子惟其有章兮出牧于民政斯臧兮噫予贈言推忠賜兮情不可既風斯長兮慷慨載歌美洋之兮抱一委順貞士其常兮

感舊賦 王寵

正德辛未寵師事林屋先生于包山精舍凡再閱寒暑而退迄今庚辰八年于茲矣乃復來山中作感舊賦其辭曰

紛余慕夫好修兮潛大道以游神  
泝江河之浩漭兮張欲渡而無津  
彼哲匠之巍峩兮揭日月于八垠  
折疏麻之瑤華兮將以贈夫斯人  
亟愴恍而仰鑽兮又靡知其  
所止紛蚪龍之下上兮尺蠖蟠於泥滓  
車既怠而馬煩兮阻山川而徙倚  
忽日月之我邁兮去冉之而不已  
經疇昔之故居兮志歛臆而顙泚  
泝淹留以無成兮將復修吾初服  
佩長劍之陸離兮冠切雲而直纛  
民生各有所樂兮放吾道於空谷  
吸朝霞以為漿兮夕復飡夫秋鞠  
苟矩矱之攸存兮冀來者之可追  
吾令羲弭節兮將

以窮乎我師路旁；其阻修兮殫吾生以求之辭曰  
驂馱斯皇莫予好也洵彼前修為我尊也海嶽嶄巖何當造也  
長夜漫漫志憑踪也矢心白日遵長道也

感別賦 皇甫汈

戊申之秋八月初吉季弟水部郎子約以制滿還闕而余羈都亭移書告別發函披誦悲不能勝嗟乎丈夫之生自懸弧矢以來孰不有志于四方故曰人豈鹿豕也而可常聚乎此光祿之賦惜其淵雲詞靡而病于兒女情多蓋別不足以興悲而情有所感于別



則悲可知矣因撰茲賦以代餞云爾辭曰

別方異緒離狀殊端在有情而必歎豈同氣而能堪輶  
車陳於垆側舟楫戒於江干或感慨於川逝或行嗟乎  
路難涕臨觴而共收心執袂而俱酸善哉江生之言曰  
黯然而銷魂值吾愛弟邁往帝閭愧雙鵠之並舉兮矯  
乘雁而孤騫若夫未營四方聊事一室侍燕庭闈聯經  
几席辨索研墳遊璣討歷繹孟氏之有三咏詩人之既  
翕至其恭承嘉惠忝竊龍光仲兮叔兮乃以軒而以翥  
伯也季也復載駟而載翔或影纓於建禮或結綬于文

昌或馳麾於趙魏或沿牒于楚湘乍乘雲雨少別關山  
旌指洛而將赴裘滯秦而未還行之路何極去之情不  
忍寄芳草于春池攬素毛于秋省夏暑溽而扇違冬颼  
厲而衾冷願奚別而非悲抑奚悲而云甚迨夫丁辰荼  
酷軫患纏綿乾覆奄奪慈景俄殲悼金昆之脆質凋玉  
樹于華年同朝露之溘盡展夜壑之已遷繫慶往而吊  
來亮福倚而禍伏豺狼逞兇蜂蠆隱毒構曾參為殺人  
收張儉而屬吏謂死灰其不然詫凝脂之可畏投清流  
使合汙惡獨醒而強醉胡人心之險熾兮亦天道之冥



昧賂苟輸而在宥兮囊無金之可致鄒投珠而遭眚兮  
和抱壁而蒙寬乏文姬以請駟兮望融弟為急原得與  
喪其齊塞兮退未遂而觸籥肆蒼鷹之亂紀兮寔桀犬  
之餘孽隕東晉之玄風兮點西州之英烈誰百口其相  
明兮空撫鏡而存舌中郎奮于鉗徒兮應相起於溺摺  
尚錄過於代門兮布揚芬于漢闕將逆施於末路兮終  
雪恥于前招斯時也雖具邇其含怕矧駕言以遠別遵  
首路之逶遲兮睇蕭晨之淒緊憑江閣之交疏兮見中  
州之帆影淮水落而彭城荒燕雲飛而異門近想天上

之仙班恍夢中之幻境榮西笑而心搖北南棲而接警  
追二陸於疇昔兮緬兩到之徂征置美酒以高會兮列  
祖燕于華楹徵綺羅之妙舞兮被絲竹之新聲懼堂中  
之蠟燭忘戶外之驪鳴雖擬跡而同別亦原悲而異情  
憤世道之黜黯兮請以予言為殷鑒衆女嫉茲蛾眉兮  
均自沉于明艷客方戒乎用光兮稽弗戢而罹患雲賦  
就而晚疲賈書上而早譴齒何貴而象焚轡乃災於豹  
變庶養德于木鷄毋取才於能雁辟涉海而獲濟兮諳  
風波之苦辛傷虎口而幸脫兮猶心悸而告人疾已痼



而復初兮舉藥石以具陳羽有落于虛殫兮咎無蹈於  
震隣紛余季之玉秀兮又襲之以蘭芳振逸響于寥漢  
兮赫挾藻于明光恩被命而攸涯兮德潤身而彌彰渺  
岐分於川岳兮瞥星散于參商季昔時兮送予之今日  
兮送子若迭代於天運匪往復于人事喜何劇而無悲  
悲何窮而無喜情生文以叙離詞因情而歛思腸屢絕  
于停毫泣欲盡而盈紙願行者其勉旃惋居者之已矣

別知賦 孫承恩

何予心之無聊兮羗忽々如有遺匪懷祿而靡釋兮乃  
獨悵々而弗怡予昔有志于泛愛兮謂傾蓋猶知心何  
人心之險幽兮迨山高而水深繫自信而靡顧兮幾顛  
陪而厄窮紛相々以相逐兮孰有能諒予之愚衷孔聖  
所貴乎無悶兮在予心其何疚歲冉々其不居兮恐媿  
修其日仆嗟夫子之何謂兮曰予心之靡他予亦未敢  
自謂其必然兮願惟夫子之與我共勵志於進修兮勤  
相予之不能羗窮探而力紹兮尚隆緒之大振指迷途  
以並驅兮謂千古其一時追逸軌而莫及兮願蹇鈍而  
已疲窺末光于德隣兮資輔仁之麗澤感夫子之巨誨

兮皦此心其如日謂因依以沒齒兮奉周旋以綢繆何  
此會之弗可常兮造欲別而莫留吁天龍而為駕兮逝  
蹇裳而去茲溯長征以遐征兮指故山以為期掩衡門  
以索居兮羗畢志乎初服奉教言之孔明兮期報君以  
不辱念夫子之惓歎兮即欲去而盤桓出都門以悄  
兮感雲龍而永嘆鳥狐飛而嗷兮獸失羣而悲鳴伊  
物類且有然兮願若為乎予情辭曰春江兮水深春草  
兮愁人靡兮長路望兮方雲岑渺懷又何極浩離思  
兮難任倘不我兮遐遺時惠我兮徽音

後別知賦 孫承恩

夫何天日之淒厲兮歲忽屆此凜冬玄雲奔兮以布護  
兮原野閱其多風舟人告予以吉日兮翩予袂乎吾將  
逝懷冰蘖以為羞兮襍申椒以為糝歲昔甲戌之南騫  
兮指故山以欣兮懷友生以戀兮尚淒惻而弗禁矧  
茲二三子之濶違兮復背鄉而去邑願予情之若為兮  
獨寤之其莫釋吁嗟末世之溷濁兮競佻儇以自賢徇  
治妖之淫狐兮子都掩抑而弗妍蹇予生之顛兮抱  
迂拙而不知去莫或諒予之獲落兮惟二三子之我與



沕淵潛以僻處兮寄遐情于逝波安澹泊而靡予厭兮  
同衡門之詠歌羗窮居之足娛兮予將終此而無悔何  
前瞻而後顧兮觸予心而多慨紛摠々其憂集兮予豈  
樂為此故也曠慈幃之晨昏兮忍而不能措也昔予有  
志於千古兮指前修以作則屯中道而遭回兮忍令名  
之不植曰不仕無義兮懷依々而靡寧苟抱質以勉進  
兮或將來之有明予既採杜蘅以充幃兮又薜荔之盈  
擷將以遺夫美人兮致情愫以永結女嬃要予以慎重  
兮盍從巫咸而訊之巫咸陟而靡降兮世悵々而誰稽

予令猿鶴以共策兮猿鶴告予以不可曰時俗之迫阨  
兮願茲行之或左抱予拙以自試兮恐柄鑿之宜然子  
誠欲丐夫濟兮思利方以為圓予詎不諒茲兮羗微衷  
之故在予誠鄙庸而靡似兮忍以祿位而自械信吾志  
以無疑兮依前修之節中置得失於自然兮詎媿姁以  
為容予兢惕而慚恧兮惟淺薄之靡濟紛羣龍之滿朝  
兮願顛々之何恃鑄柔鉛以為劍兮束葭蒂以為楹不  
審己以自度兮將顛殞而莫任道貴黽勉兮予其敢摧  
頽而自畫砥終不可使為瑄兮俟顛隕其奚益吾與猿

鶴共要兮洎松菊使為盟曰吾行之不遠予保嫖節以  
堅貞繫二三子之共鑒兮諒斯言之靡措叅追隨以無  
由兮獨臨風而延佇辭曰維吾行兮合散故無常期與  
子別兮又何嘆息而增歎歲忽々其邁盡兮恐流光之  
弗居其各崇爾德兮庶以究將來之所基

擬思舊賦

王文桂

丁酉季冬予與張太華方十洲沈秦川同舟赴春官  
昔同浙薦今幸同行甚懼也除夕泊彭城沙淤冰互  
明發將起陸同車于是釀飲太華少舉酒唱流水馬

和車頃刻間途路別清音嬌婉傾座悽慘淑質高才  
罕儂云秦川掄魁太華固窮績學竟天十洲承天守  
終予每御飲聞唱此二句即泣然沾襟蓋思日月輪  
迅閃電奔駒舉世大夢逆旅胡殊抱奇莫展賫志永  
違傷哉延效向子期思舊賦聊志感云

將射策於南宮兮遂束裝而北征濟清淮以同舟兮宛  
孿如之年情洶洪濤之浩濶兮紛雪霰而冰凌沙且淤  
而水涸兮暫紼纒於彭城燔柴燻天而爆竹震兮伴旅  
次之孤燈釀設醴以交懽兮揚高調於新聲岐塗路之



易別兮迅頃刻而無停藹白雲于鄉閭兮罩紫霧于彤  
亭奪錦袍於綉句兮誓臚占於一經那燕羽而低翼兮  
翼再飛而再驚奈壁判而珠沉兮至寶喪而離形記玉  
樓於閭闔兮殆修文於玉京抑文昌之化現兮應張翼  
之列星黯萎貧而不汙兮項託天而無成徒梓窮居之  
稿兮留宇宙之空名十洲橫金而遲逝兮俱放浪于蓬  
瀛徇遼鶴之雙兮挾游仙以憑陵催晷景之殫拍兮  
訝日月之頻更又孰短而孰長兮搃齊之而杳冥維天  
地有混沌兮世何人之久生獨全神而不忘兮超塵劫

而遐升肆求舊而難悟兮汜輾轉而靡寧望寥濶而寂  
閨兮心怵惕而怍怔越發奮而偃蹇兮竭殫冠之無朋  
隻隨陽之鴻雁兮搖在原之鶴鷓惜失羣而翔集兮每  
顧影而悲鳴豈伊人而不如兮寒雞壇之夙盟一誠可  
通金石兮烏問於幽明曾思顏之不校兮顏胡舍曾孔  
門之重朋兮允麗而匪輕末俗之涼薄兮倏雲雨之陰  
晴追蘭臭以長嘯兮感伐木之嚶々

招文江子賦 沈壽民

文江子者白門人也而冬即予于金華之北山千里

而至一年而去浪々乎渙予涕以悲文江子曰奚悲哉秋風吟其至矣于是賦焉送之且招之

滔々朱夏兮霍々淫雨我友諏吉兮朝發蘭渚抗手羞顧兮嗔胡忍予曰馮秋風兮爰憩我所何秋風之嫺々以浙々兮偏茲家漠而不吾以聽誰鞭日使南陸兮導征人遂焉戒艤霽晨霞於一息兮眇煙藪之青々進不得相從於宛之疆兮退蹠蹠乎寶婺之山庭表緯繡以繚悵兮塊吾潛憩此遐荒屈魂離而靡託兮疇宗招之徬徨履前除以懸睇兮浮雲森眩而蒼黃狼從目往來

以娛兮虺九首其又翱翔閔吾遭之多壘兮生與死而不可瞽羗俵々而無相兮顛羈旅而梯禍騰波瀾澆以激天兮獨橫江而喪舸颺々洪濤之震屋以騫兮分軌方巢而委墮私指景以明誓兮衆捷足而笑跛季夫人之不遐以棄兮渣仇離其去我怵於邑余廓處兮爰涉崇岡以宣憂耀靈睨矚其西匿兮流雙眸而不周何玉虹之宛々以下飲兮盆飛瀑而悠々赤松仙而不遺厥昆兮孰余兄弟之同原以異取頽紫微之谿壩兮又劉先生之所室也奔吳越於蟲之堂兮吾奚子焉此日也洞



天閱而次寥兮亦臯羽游錄之所頌也後百世而茹痛  
兮吾亦有文丞相之慟也曾躋趾以右顧兮藐仁山之巖崿  
崿巖巖以嗟峨哲人之遇猶吾遇兮胡道遥而不失乎故阿  
步徙倚而又換兮八素復蜿蟺迎眺乎南端既羸政其  
栗烈兮胡多士之攘之逋跡而猶獲護夫高冠楮余杖  
以假息兮烏噉侶而儵東驚顏許之飲血於杯土兮吾  
何為乎此中亟返屐以降觀兮匪潛溪之冲融起史氏  
於九原兮吾欲共灑泣乎禾黍之宮心愴恍而酷愬兮  
行旣翫而安適捷雙扉於陰林兮酬孤影於永夕蠶營：

以羣伺兮蛾蟻之而自擲竹靡之而窺窓兮水層之而  
閉石欵衝颿之磴以擊兮憶荃之結期於秋風祝融秋  
風祝融忻之其揚靈兮安蓐收之輒逢且吾執祛於澱  
之野兮時未復而歲同顧相尋於獨夜兮道黯黯抑誰  
通驟顏思而就林兮夢忽吾乎江臯戲鴻鶴之比翼兮  
哂蛟龍之吹濤偕之子以截度兮戾故都而非舩前趾  
壯而若余咎兮又微後跽躄以蕭騷魏之鍾阜之鬱而  
槩天兮孰愛然而蔽之塹長江之洶之而南限兮孰褰  
裳而濟之有喤鐘鼓兮孰在庭而繫之有芬蘭芷兮孰

化茅而替之吾攬涕於華陽之墟兮龍門折而漢顛也  
吾憫清漳於木求末兮宗廬陵又以然也望樓山以掩  
噎兮企海陽而束芻夫死有婦兮師死有徒指白苧以  
求纓兮注昏門而酌酒生則同心兮沒亦攜手泪汨汨  
以難禦兮魂狂々如有求嗚孤雲之翔於敬亭兮吾為  
能此乎久留挈余偶以迅馭兮恍睽矐返乎舊丘長汀  
潔而千年兮梅溪芳而合流哀予生其屢蹶兮亦芝焚  
而蕙愁完之人聽之天兮或有鑒于明幽排榛墟以覓  
逕兮適吾造夫雙羊松門慘闇而蕪翳兮腹崩剝而自

戕伏黃土之屹々兮仰蒼帝之茫々罪工通而降戾兮  
不亟殉而又焉行神僂々其有接兮意悃々以欲訴哭  
銜痛而無敵兮身纒踊而又仆奄伊人之嘆其相勸兮  
寤形開而頓寤偃空堂而固覲兮并安所躡於夫歸路  
起披衣以浩漢兮光熹微之搖々理前約而愉志兮怨  
百草乎方驕余豈不惜茲百草兮故人曠其既遙佇秋  
風而締思兮倚南窓以寄招々曰秋風來兮颺颺朝不  
還兮慕予心抽雲霓々兮谷幽々廓抱影兮誰傳願言  
思子兮廻輶重曰碣磧兮大家音溪潺浚兮秀魚藹松



間兮誰之廬誰之廬兮待子紛狂攘兮為如

思子賦黃宗會

暗荒雲稠霧網繚糾以馳騁兮粘天谷而崩墜彼哀壑  
傾崖礫硿礧砒沓以迴抱兮重以旋風走瀑之轟飈莽  
長林之蕭鬱歎蔓幕以窮蔓索落兮嘯罔象而舞夔魍  
蟋蟻既喘哀喙於積葉兮訓狐厲飢吻於危枝彼巋然  
之新壘兮竊獨此二孺哀叫天之無辜兮慘不知其所  
之形眇兮而日遠兮魂斃兮而誰依月逝年徂其炯神  
朗識恐隨風雨而遷改兮又何况綽約之容姿何予生

之多虞兮變故曲折而交推兩兒見屠於匝月兮行道  
之人亦為之心惻而淒其走房櫳而悄滅兮坐書室而  
如疑倚道傍之榆楸見同學之翩翹兮猶獨憶其佻儻  
而不來淚漬篋中之陳衣兮重之以殘書弄墨之紛如  
豫章之折於拱把不足見其寵從干霄兮秋蘭之闕其  
芽茁又孰佩夫續紛芳菲忽矯首以遠望兮目恂瞽以  
神馳休歇行流兮痛返逝之無期使死而無知掬化安  
之坏土以封汝骨兮猶愈夫爾醜我骼甲脊乙脇漂泊  
于河壖江湄死而有知兮則上為皇祖之宅兆旁為汝

叔之埤壘其中象之多汝戚兮又奚若夫伶仃而無歸  
 藥化安之玄鹿兮或先驅之以角螭化安山舊傳有玄鹿又有蛇者角鬚  
然上出或曰虬也駭杜鵑之爛漫兮俄霜風之披離春花秋月  
 風晨露夕兮汝宜挈汝弟以追隨北山之缺其上可登  
 以望汝家兮慨然念平昔之遨嬉野烟倏起而鞦韆兮  
 梧楸尚彷彿乎舊籬越埃壘而薄神霄兮始皎然蛻塵  
 寰之垢滋彼天地之無窮恒千萬年一瞬兮耄殤又區  
 區相較於暮暉思平生之誦讀兮精力過絕乎等夷不  
 能口論手畫少有所施兮長松之下白石之側後千載

猶聞其哦依呀





